

Genua summum magistratum sustulerit, eoque sublato, fræna potentissimæ urbi injecerit. Nec illud ignoratis, quam perditâ fiducia nos legibus pacis obnoxios improvise bello fregerit. Qui totiens igitur jura divina & humana pervertit, is (quis non videt?) plane docet, pro infectis habenda, quæ cum perfido sanxeris. Sed jam tacitus consensus vester efficit, ut propemodum intelligam, persuasum vobis esse: non nostræ Reipublicæ præsidium magis hac mea oratione peti, quam vobis incolumitatem, successum, & amplitudinem: quibus perfidus ille, sagax, astutus, rei bellicæ peritissimus, fido milite, ærario, amplisque vectigalibus fretus, non minus audax quam paratus imminet, tantisper dum res nostras penitus afflixerit, in vos bellum dilaturus. Nec vos, quia plus non posse videamur, a nostra societate abstinete. Quaquam enim magnas profuderimus opes, adhuc majores, si non publicæ, privatæ supersunt, quas pro libertate retinenda ultro effundere parati sumus. Jungite igitur arma, jungite vires: vestram nostramque libertatem, Rempublicam, patriam, pio consilio, pioque fœdere servate. Nam quod ad illud transigendum attinet, nullas damus conditiones, nullas a vobis dandas recusamus. Quum dicendi finem Laurentius fecisset, ita Patrum animos illius verfarat oratio, ut non Senatorum inter se, sed singulorum etiam variæ essent sententiæ: hinc Philippi potentia periculoque Reipublicæ, inde Florentinorum æmulatione & impensa belli gravissima alternantibus. Placuit itaque, non prius responsum dari, quam Philippi legati audirentur: qui ne eorum quæ Laurentius dixisset ignari, parum objecta diluerent, senatorum plerisque est negotium datum, qui privatæ necessitudinis specie Mediolanensibus omnia, quæ ille dixisset, denunciarent. Quo contigit, ut dato illis Senatu, Joannes Aretinus ab humanarum literarum studiis non abhorrens: patrio quoque ad id sermone adjutus, permitte collega, in hunc fere modum sit locutus.

Quæ res, quæve causa Philippum Mediolani Ducem impulerit, ut nos ad te, Princeps illustris, sanctissimum-
que

*Patrum
sententia.*